

Narya

Imesimuliwa na Fulani
Kisangiro, 2001

Mwana Ngho, ebina lilya bakebeerwe Mugwe lee "Mbisiriyeeta" - bantu badinkage. Bagahabwa lugho lolyo; bakelugaana bagwatele, buhembe bobyomo, ale anyukwe ang'ore eja kono. Nadugana akayya ehewwa gituru gekyo aaje nakyo Tinaga, gituru kya mbori. Aaje anuntye ho ang'ore eba mugharisya, akahakure meso. Gisa abahakura lee, olya agaghubuka, olya wa bagwe, akaaja Tinaga.

Gukabugwa, "Ee, mugwe wa Besanga nabaja. Ryolo ngo kola nabaja lee; talai sedani." Bakabuga, "Tuje Jila, dutije Maghandalyani jajyo ja Besanga." Jila abwa nwo mugwe wobo, ngoya.

Monto mulakolo olya akamubeela, "Ryolo ngo, leya, syee ntubalega etuubwa? Booka, tuyye weto. Tukasoore malya." Mbori yehene neno ele na kaburyani. Aahika, akamubeela, "Aja babo?" Akabuga, "Syee, ntubalegwa batemi lee?" Akagwata mbori. (Ghambageu.) Akabuga, "Syee, nobadaba mbori eyo ya?" Akabuga, "Nwalala na jalo?" (Mugeni) Akabuga, "Syee, ntikamelete mariba nse. Gwata mwenihe." (Mulakolo) Akabuga, "Ngwadata mwenihe, syee nkankate, baba?" (Mugeni) Akabuga, "Kang'ana ng'ina sei, kagwate."

(Mulakolo) Nabakagwata, akagwata, nkabaghubwa bulya kagaanate obyo mate lee, ale kabookelaga, ale kabookelaga, gakang'ore ema lyonse, ekasenjwa gughumire. Aahika (Mugeni) akabuga, "Koo, gharerya mugongo jojo bujaregu."

Olya (Jila) ngo aaja lee wa Batinaga, akaraberya sei. "Syee, kaburyani gaka nkalya ka mwa ng'aniya, ale kababa kang'ana ng'ombe? Ajage babo." Akaebuga balome, "Monto abasinja, kaburyani ka mwa ng'anya, ale kababa kang'ana ng'ombe." Bamwe babuga, "Mubatuhota ya."

(Mugeni) Akabuga “Gharerya mugongō jojyo bujaregu.” Jugagharerigwa. “Ghareryai mahigo.” Jagagharerigwa. Akabuga, “Ndaghai, njoo. Booka, ema ayyo; talonga njibara monto abugwa Nadugana.”

(Mulakolo) Akabuga, “Naleho.”

(Mugeni) “Naleho?”

(Mulakolo) “Ee.”

(Mugeni) “Booka, ema ayyo. Mubeele, ’abwa njoo, tomwa mugeni nagukondate.”

Akabeelwa, “Syee, ahakura mēeso.”

(Mugeni) Akabuga, “Kabuge bobyō sei.”

Olya (Mulakolo) akahuma. Akayya ema ayyo. Akabuga, “Nadugana!”

Akabuga, “Yii.”

(Mulakolo) “Abwa njoo. Tomwa monto mulakolo ale ohō.”

(Nadugana) Akabuga, “Ale monto mulakolo weene atije ebuga ntibanaga nse?”

Olya akamubeela, “Abwa asoore wa emweriga kuboko.” Naje akaerigwa kuboko, asyala.

(Mugeni) Akabuga, “Nadugana.”

(Nadugana) Akabuga, “Yii.”

(Mugeni) “Syee, nie nkubugelate.”

(Nadugana) Akabuga, “Nwe ou ngo?”

(Mugeni) Akabuga, “N’olya akuhonokiryē na mwana ngho bwelō bwa Lweda.”

Akarooha, namkebya mikono.

(Mugeni) Akamubeela, “Haaba endaba.”

(Nadugana) “Nagita bo, syee, ntikubone?”

(Mugeni) Akagita obyo nghati mēeso, jukabuga, “*Ghwee!*” Akaba syangigi.

(Mugeni) Akamubeela, “Ghai, tōla kwayyo ng’ayyo. Mbasenjelwa ohō, nwe nkaribyari yawa, tōla mugongō jojyo na mahigo jajyo okalye.”

Nobamanya, laabu daghama ngo ndyo kwagita bo? Ndyo ngo kwamoganwa bantu baba Batinaga ya ale, bakajaghe mugwe n’etumu. Gukabugwa, “Balome, ndaghai, dutaleni sedani. Syee, budiko mubalangangya mugwe. Ryolo ngo, bwabo?”

Gukabugwa, “Akondate soorai birigisasi biina, bya ng’ombe bibebe na njaghamba ebele na birigisasi bya mbori bibebe.”

Haale monto aale abugwa Narya. (Mwingine) Akamubeela, “Syee, nwe ole ohō laye. Sama esega.”

(Narya) Akamubeela (Mugeni), “Mbakuha ng’ombe eyō.”

(Mugeni) Akabuga, “Ntimikonde.”

(Narya) “Mbakuha eyō.” (Mugeni) “Ntimikonde.”

“Mbaguha eyō,” “Ntimikonde.” “Mbakuha eyō,” “Ntimikonde.”

(Narya) “Aja, nie ntihabanete ya ekuha. Aja ge, okondate nji?”

(Mugeni) Akabuga, “Nie walēga eng’a na gaghula gakyō laye, oting’ejate ja.”

(Narya) Akamubeela, “Gakyō?” Akamubeela, “Ee.”

(Narya) “Nghula? Na nghula? Nghula na Narya.” Akabuga, “Nghula na Narya!”

(Mugeni) Akabuga, “Ee. Tiga ng’oni ngēere kwaeto.”

Otibanaga bulya mbori emwe elaalaga n’ebiryani byehe wakōla baraare hamwe. Nabo mwana gaghula beene baraare hamwe. Olya atambarya lee, jikamurohya bo sese. Ndyo ngō (Narya) abuga lee, “Ng’anya ng’ina!” (Mukehe) Akabuga, “Yii.” “Ng’aa gasangeta gakyō.” (Mukehe) Akabuga, “Nwahira ko?” Akabuga, “Nabolaga kiryooka geke kijate. Mwana gaghula batigendete bure.”

Akahēbwa gatumu kalya mukehe. Akamujagha ohō kibelo. Aamujagha kibelo lee, olya akalikoola, akaligaana. (Narya) Akamujagha gikuba ligaghubukya eguha lya mugōngō akayya egwa gugharye.

Daba ngō, ekajagana ngōya. Bakabuga, “Ryolo mubabolaga mugwe wa Besanga, ntukesubwa, bookai.”

Mai jaja ja Ruyyaga jatyalēhō. Jōonse njaja ja Mweryane njōbatoreere. Agatōlwa akahirwa aghagharwa hō lee, kimiri kigatōnya mai ja Ruyyaga jakagenda, jahumire kulenga kudatu. Akahirwa Lodimi. Kimiri kigatōnya; mai jakagēera. Akahika akajagha hantu tubugate Ngaramodi kamai kalehō. Kigatōnya; mai jakagēera. Agasamigwa akayya

Lorogegi. Kimiri kigatonya; mai jakageera. Akajagha Orijani ja Mesiro, gikatonya. Ayyo akasyarigwa ngo wobo ya. Bagakola hantu hahika obyo na juhe lee Ndosingo.

Ntije kola nokemanya hantu habugatwe Mgurengine ngughujatwe.(Mugeni) Agakola nkaribyari yehe na mukehe ng'wo ngo. Abuga lee, "Ntihamundetye na bantu baba. Nageera. Ale enye muhaaba ehuma ale nie nahuma. Bulya mubojya lee, monto nakambe elabya gwa kaane." Gughobirigwe ngo edari lilya ya ale gwaghujagwa. Gutighujelatwe mugwe geya?

(Mugeni) Akabeela nkaribyari yehe yale ebugwa Naroi, "Ghai wabaka oyyo. Mbamutiga ale kiburi. Aabyala lee, muhireni kijomine kya ng'ombe. Beelani Bamageri boonse, monto nahaaba ehingola ng'ombe njitoole kijomine kya mweto jyoonse. Mugekeni bobyo kamwana kene. Mwaakola kale esaaru lee, mukambe emwankya. Mwaakola kale bughu lee, mukambe egankya. Waahika ngo lee, batemi barube bakebuga mbagwatya mugwe wobo gighoba, ng'ombe jikeba mbogh. Mwaghayya kimwe, mwababeela bayya ekeba mugumu baaje ejudiginya bajwoghosa bagwatya mugwe wobo gighoba, balenga. Ng'ombe jyayya kunge."

Nabariserya gikuba. Nabahuma na gatumu. Nabakajaghela ndiba ndane, elya ale nabegana ho. Gisyangu nkibabuga 'muu' kyayya ejagha bighundu bibyo lee. Raari oyyo bantu balya boonse bakaba bughu. Bakasira.

Laabu daghama ndyo wabaka wehe abyalate. Etongo likabuga nesye ba gighoba. Ng'ombe yabuga nyagwatwa lee yajagha monto yamgaana bo mbogh. Oyyo nkaribyari yehe akababeela, "Mbabeele, haabai ja ng'ombe. Gakebeni mugumu muje. Mbabanye jukayye ekebwa jukayya eoghoswa." Akayya etolwa, kugakolwa atigwete masaru nanga ati bughu. Akalsetwa baaja, bakalaala.

Laabu gutune lee, baabooka bakojya "*Bilibili*." Baajokya meeso, bakola njau ya nsirori yemire kaane. (Mwana) Akabuga, "Ng'ombe ya baba nebaja. Misenjeleni mgwatye gighoba." Ekagwatwa, ekajagha nkanu, ekagwatwa gighoba yagwatwa gighoba.

(Mwana) Akabuga, “Etiletwe mbaka.” Nkaribyari yehe akabuga lee, “Ale lee, maa nwatiga mwoko na maghoya?” (Mwana) Akabuga, “Ryolo, obugate bo?”

(Dada) Akabuga, “Ndiseri etiga mwoko na maghoya.”

(Mwana) Akabuga, “Mbageera gituje nalye kiburi gya nse. Ky’egolo lee, gitighwasete elebwa nwa baka.”

Gituje ngo ni nji? Mbaraki ti yo ehingirye busoka? Nyo ngo kubageeranwa oho.

Wabalome, akajoka kono mikono eno, n’eghoti lele na mutwe. Kono nakyo bulya mbaru jiji jyageera lee nkwo kubaba kwa bagagheera. Ryolo Barughata batina gitemi kyene?

Enye mule nakyo? Yaa! Manosi joka. Nobojya? Ale agatiga egita obyo geya. Basingo ng’o nsirori nayo yalolela ya, “Ee.”

Mwana ngho; alejaga bantu ale na lughu lulehu lukegaanwa. Lukugwatele buhembe bobyonganga hati hange hikegwata n’eghoti. Nanga lutighubete okye. Okenyukagwa ale wedekelage bo bulya mbori ekobagwa ong’ore ebahikela. Basi, waabahikela ngo, wakebwa eghoti. Ale hati lilya wojagya, kubagagwa gantu gaka kababa, “Gituru kya mwa Nayyere”? Nwojagya byo nanga atyojagya?

Nkyo gya nkya eyo abeelwa, “Ghai ngo, gera gukilya. Gyaasira lee, kigaana busyone ale okagitole, anyurya sei, agaana lee. Ale akayya egitola akola kibaghayya nyama.

Aajoka ekilya ayya elaala halya abalaala akang’ore eyya Tinaga nkyo gekyo.

Akaghayya kimwe, akabeelwa, “Obookire ko?” Akabuga, “Mbookire Narasura.” “Ale oghayyagya nji?” (Nadugana) Akabuga, “Nde Muturi.” Nobojya? Basi ndyo aaba Muturi wa ho. Ale Bansiliga bajela nkere gwe Sanga. Oyyo nwo ababa Muturi wa ho. Ale aaje akolwe ho mugwe, aamuha butoryo bwetoola ho. Bahirwe hantu haleho habugatwe Makeba, abeelwe, “Maka oho.” Nobamanya? Syee ge ndya bobyonganga.